

На Господи воззвах

ставим стихов 10 и поем Триоди самогласен дне, дважды, и подобны 3, и праздника 3, повторяюще две, глас 6. Подобен: Всю отложивше:

Совет превечный/ открывая Тебе, Отроковице,/ Гавриил предста,/ Тебе лобзая и вещая:/ Радуйся, земле ненасеянная:/ Радуйся, купино неопалимая:/ Радуйся, глубоко неудобозримая:/ Радуйся, мосте, к небесам преводяй,/ и лестнице высокая,/ юже Иаков виде:/ Радуйся, божественная стамно манны,/ Радуйся, разрешение клятвы, // Радуйся, Адамово воззвание, с Тобою Господь. **(Дважды)**

Являешься мне яко человек,/ глаголет нетленная Отроковица ко архистратигу,/ и како вещаеши глаголы паче человека?/ со Мною бо рекл еси/ Бог быти, и вселиться во утробу Мою./ И како буду,/ глаголи Ми, вместилище пространное/ и место священства херувимы превосходящего,/ да не прельстиши мене лестию,/ не бо познах сласти,/ браку есмь непричастна:// как убо Отроча рожду? **(Дважды)**

Бог идеже хочет,/ побеждается естества чин,/ глаголет безплотный,/ и яже паче человека содеваются,/ моим веруй истинным глаголом,/ Всесвятая Пренепорочная./ Она же возопи: буди Мне ныне по глаголу твоему,/ и рожду Безплотного, плоть от Мене заимствовавшего,/ яко да возведет человека, яко Един Силен, // в первое достояние с растворением.

Слава, и ныне, глас тойже, самогласен. Иоанна монаха:

Послан бысть с небесе Гавриил архангел,/ благовестити Деве зачатие:/ и пришед в Назарет,/ помышляше в себе, чудеси удивляясь:/ о како в вышних непостижимь сый от Девы раждается!/ Имей престол небо и подножие землю,/ во утробу вмещается Девичу:/ на него же шестокрилатии и многоочитии зрети не могут,/ словом единым от Сея воплотиться благоизволи,/ Божие есть Слово настоящее./ Что убо стою, и не глаголю Деве:/ Радуйся, Благодатная, Господь с Тобою:/ Радуйся, Чистая Дево,/ Радуйся Невесто Невестная,/ радуйся, Мати Живота, // благословен плод чрева Твоего.

Вход. Свете Тихий: Прокимен, и чтение дне, и праздника три.

Таже, Да исправится молитва моя: И поклоны 3 великие, и прочее преждеосвященных.